

Inatsisartunut aalajangiiffigisassatut siunnersuutigineqarpoq Naalakkersuisut peqquneqassasut Inatsisartut peqqussutaata nr. 12, 19. November 2007-imeersup Namminersornerullutik Oqartussat kommunillu inissiaataannik attartortittakkanik inissiatut imaluunniit illutut nammineq pigisatut tiguisarneq pillugu, aalajangersakkat allanngortinneqassasut ilaqutariit ataatsit illui tuniniaanermi akitinneqartut kisiisa atorlugit tiguneqarsinnaalersillugit.

(Inatsisartuni ilaasortaq Steen Lyngé, Atassut)

Akissuteqaat

(Ineqarnermut, Sanaartornermut Attaveqaatigiinnermullu Naalakkersuisoq)

Siullermeerneqarnera

Inatsisartuni ilaasortaq Steen Lyngé ”attartortumiit piginnittumut” aqqissuussinerup allanngortinneqarnissaanik aalajangiiffigisassatut siunnersuummik matuminnga saqqummiussineranut qutsavigaara.

Siunnersuut imatut paasivara, illuni ilaqutariinnut ataatsinut inissiani attartortut inissianik najukkaminik pisinissamut qinnuteqarsinnaajunnaassasut, aammalu illut ilaqutariinnut inissiat taamaallaat attartortup inissiamit najukkaminut nuunnerani tuniniarneqarsinnaalissasut. Aamma tamanna attartortup niuernerminni naliliineq tunngavigalugu neqeroorfigineqarnerani akiusup, illup Namminersorlutik Oqartussat tamanut ammasumik tuniniarneqarnerani akigitinneqartussamut naapertuunnissaata qulakkeeriviusinnaangitsoq siunnersuuteqartoq isumaqartoq paasivara.

Innuttaasut inissianut najukkaminut akisussaaniissamik kissaateqartut tamatumunnga periarfissinneqarnissaannut Naalakkersuisut tapersersuinissartik kissaatigaat. Taamaattumik aamma innuttaasut amerlanerusut attartortuunissamut taarsiullugu inissianik imminnut pilersornissaannut tapersersuinissartik Naalakkersuisut kissaatigaat. Taamaattumik inissiamik najukkamik ”attartortumiit piginnittumut” aqqissuussineq malillugu pisinissaq periarfissaavoq. Pisinerminni niuernerminni naliliineq tunngavigineqartarpoq, aammalu naliliineq suliamik ilisimasalimmit attuumassuteqanngitsumit suliarineqartarpoq. Tassalu tassani illu tamanut ammasumik tuniniarneqarnerminni qanoq akeqartillugu tunineqarsinnaanersoq tunngavissalimmik eqqoriarneqartarpoq. Taamaattumik matumani ”ikinngutinut akigititanik” atuisoqartarpoq Naalakkersuisut isumaqanngillat.

Attartortup inissiaq attartukkani nammineerluni pigisatut pisiarerusukkuniuk, attartortup nammineerluni pisinissani Namminersorlutik Oqartussat kommunillu illuutaannik attartortittakkanik tiguisarneq pillugu Inatsisartut peqqussutaanni § 4 naapertorlugu qinnuteqaatigisussaavaa. Attartortoq inissiamik attartukkamik pisinissamut

aningsaqaarnikkut periarfissaqarpat, qinnuteqaat suliaralugu aallartinneqassaaq. Kisiannili attartortoq inissiamik pisinissamut aningsaqaarnikkut periarfissaqanngikkuni attartortut najugaqaannarsinnaavoq.

Inissiamik attartukkamik pisinissamut periarfissaq illunut ilaqutariinnut ataatsinut atuukkunnaassappat, tamanna illoqarfinnut minnerusunut nunaqarfinnullu kingunerluuteqartussaavoq, taakkunani illut ilaqutariinnut ataatsinut inissiat amerlanerummata. Taamaalilluni ”attartortumiit piginnittumut aaqqissuussineq taamaallaat illoqarfinni annerni atuussinnaalissaaq, tamannalu nunatsinni innuttaasunut naligiinngitsunik periarfissaqartitsinermik pilersitsiviussaaq.

2015-imi Namminersorlutik Oqartussat inissiat tallimat ”attartortumiit piginnittumut” aaqqissuussineq naapertorlugu tunivaat, tassalu illoqarfinni Nuummi, Maniitsumi, Kangaatsiami, Tasiilami Ittoqqortoormiinilu tamarmik ataaseq. Tassalu illunik ilaqutariinnut ataatsinut inissianik attartortut inissianik attartukkaminnik pisinnaajunnaartinneqarnissaat, amerlassutsit eqqarsaatigalugit annertuumik isumaqartussaangilaq, aaqqissuussinermik atuisimasut ikittuinnaammata. Kisiannili assersuutigalugu illoqarfinni Kangaatsiami, Tasiilami Ittoqqortoormiinilu aaqqissuussinermik atuinissamut periarfissaarutissapput.

Taamaattumik attartortut taakku inissianik najukkaminnik pisinissamut periarfissaarutsinneqarnissaanni suna siunertaanersoq eqqarsaatigilluartariaqarpoq, pingaartumik illoqarfinni minnerni nunaqarfinnilu inissianik nammineerluni pigisanik pisinissamut taarsigassarsinissaq ajornakusoorsinnaammata.

Namminersorlutik Oqartussat kommunillu illuutaannik attartortittakkanik tiguisarneq pillugu Inatsisartut peqqussutaat nr. 12, 19. november 2007-imeersoq naapertorlugu ”attartortut, inissianik najukkaminnik niuernerminni naliliineq tunngavigalugu, aningaasannorlugu 60 %-inik aningaasalersuillutik pisinissamut periarfissaqarpat. Kingulliit 40%-it taarsigassarsiatut tunniunneqassapput.

Illoqarfinni minnerni nunaqarfinnilu aningaasalersuinissamut atugassanik pissarsiniarneq ajornakusoorsinnaammata, aamma konto pingaarneq 72.06.51 Inissianik tuniniaaneq oqaasertaliussamik ilaqartinneqarpoq, tassanilu attartortut inissiaq 275.000 koruunit inorlugit niuernerminni nalilerneqarpat, inissiamik pisinermi akilersuinissamut periarfissaqartinneqarpat.

Tassalu illunik ilaqutariinnut ataatsinut inissianik attartortut inissianik attartukkaminnik pisinnaajunnaartinneqarnissaat Namminersorlutik Oqartussanut aningsaqaarnikkut annertuumik sunniuteqartussaangilaq, kisiannili pingaartumik illoqarfinni minnerni nunaqarfinnilu innuttaasunut annertuumik isumaqartussaalluni.

Aaqqissuussinerni pilersinneqarsimasuni attartortut Namminersorlutik Oqartussanut taarsigassarsinikkut pisinissamut aningaasalersuinissamut periarfissaqartinneqarnerat, amerlanertigullu allanik qinigassaqartannginnerat tamatumunnga peqqutaavoq, illoqarfinni minnerni nunaqarfinnilu inissiamik pisinissamut realkreditimit aningaaserivimmilluunniit taarsigassarsinissaq ajornakusoorsinnaammata.

Kiisalu attartortut inissianik attartukkaminnik pisisinnaajunnaartinneqarnerini, innuttaasut taakku piginnittutut inissinnatik attartortutut inissisimaannartariaqarput, taamaalillunilu illu tuninngitsoorneqassalluni.

Taamatut naatsumik oqaaseqarlunga immikkoortoq Inatsisartuni suliassanngorlugu tunniuppara.